

Evening Dogri (NSD)

Bulletin 10-02-2026

आकाशवाणी

खबरां

- लोकसभा च टीएमसी दे अलावा विपक्ष नै अध्यक्ष ओम बिरला हुन्दे खिलाफ अविश्वास प्रस्ताव दा नोटिस दिता ऐ।
- लोकसभा दी कारवाई बक्ख बक्ख मुद्दें पर विपक्ष दे हंगामे करी दपैहरी 2 बजे तकर आस्तै स्थगित करी दिती गेई मगरा कारवाई सुचारु ढंगै सिर चारी ऐ। राज्यसभा च केंद्रीय बजट 2026-27 पर चर्चा परतिए शुरु होई गेई ऐ।
- संसदीय कार्य मंत्री किरिन रिजिजू होरे विपक्षी सांसदें पर लोकसभा दी कारवाई बाधित करने दा आरोप लाया। उने आक्खेआ जे विपक्ष दा आचरण सदन दी गरिमा प्रति उन्दे अनादर गी दर्शान्दा ऐ।
- गृह मंत्री अमित शाह होरें अज्ज नमी दिल्ली च साइबर धोखाधड़ी कन्नै निबडने ते इसदे पारिस्थितिकी तंत्र गी तबाह करने पर आयोजित राष्ट्रीय सम्मेलन दा उद्घाटन कीता। गृह मंत्री होरें केन्द्रीय अन्वेषण ब्यूरो-सी बी आई दी नमी साइबर अपराध शाखा दा बी उद्घाटन कीता।
- बंगलादेश च 13मीं संसद चुनाव ते आस्तै प्रचार अज्ज बडलै सम्पन्न होई गेआ। मतदान बीरवारें होगा।
- भारतीय क्रिकेट कंट्रोल बोर्ड-बीसीसीआई नै सीनियर मर्दे ते महिला टीमें दे खडारिणं दे सालाना अनुबंधें दी घोषणा कीती ऐ। रोहित शर्मा ते विराट कोहली जनेह टेस्ट ते टी-ट्वेंटी क्रिकेट सोयां संन्यास लेई चुके दे सीनियर खडारिणं गी ग्रेड बी च रखेआ गया ऐ।

<><><><><><>

No Confidence Motion

लोकसभा च विपक्ष नै अध्यक्ष ओम बिरला हुन्दे खिलाफ अविश्वास प्रस्ताव दा नोटिस दिता ऐ। लोकसभा सूत्रें मूजब, विपक्ष नै एह नोटिस लोकसभा दे महासचिव होरें गी सोंपेआ ऐ। सूत्रें दस्सेआ जे नोटिस दी जांच कीती जाग ते नियमें मूजब अग्रे दी कार्रवाई कीती जाग। कांग्रेस, डीएमके, समाजवादी पार्टी, आरजेडी ते वामपंथी दलें सनें विपक्षी दलें महासचिव होरें गी सोंपे गेदे नोटिस पर दस्तखत कीते । जिसलै कि तृणमूल कांग्रेस नै इस पर दस्तखत नेई कीते ना।

<><><><><><>

LS-Adjournment

लोकसभा दी कार्रवाई बक्ख बक्ख मुद्दें पर विपक्ष दे हंगामे करी दपैहरी 2 बजे तकर आस्तै स्थगित करी दिती गेई। पैहले स्थगन मगरा दपैहरी 12 बजे बैठक परतिऐ शुरू होने पर संबंधित मंत्रियें अपने मंत्रालय दे दस्तावेज पटल पर रखे। इसदे मगरा पीठासीन अधिकारी पी.सी. मोहन होरें केंद्रीय बजट 2026-27 पर चर्चा करानी चाई पर विपक्ष दे सदस्य लगातार नारेबाजी करदे राऐ। श्री मोहन होरें प्रदर्शन करा र दे सांसदें सोयां चर्चा च हिस्सा लैने दा ते सदन दी कार्रवाई चलने देने दा आग्रह कीता। केंद्रीय संसदीय कार्यमंत्री किरन रिजिजू होरें विपक्षी सदस्यें सोयां सदन दी कार्यवाही चलन देने दा आग्रह कीता। उने आक्खेआ जे शोरशराबे करी संसद दा कीमती समय बर्बाद होआर र दा ऐ। उने आरोप लाया जे विपक्षी सदस्य सोचसमझ करिए कार्यवाही च बाधा पा र दे ना। श्री रिजिजू होरें विरोध प्रदर्शन करा र दे सांसदें सोयां सदन दी गरीमा बनाई रखने ते बजट पर चर्चा कराए जाने दी अपील कीती। पीठासीन अधिकारी ते संसदीय कार्यमंत्री हुन्दी अपील दे बावजूद विपक्षी सदस्यें दा हंगामा जारी रौहने करी सदन दी कार्यवाही 2 बजे तकर आस्तै स्थगित करी दिती गेई। इसदे थवा पैहले अज्ज बडलै सदन दी कार्यवाही शुरू हुन्दे गै पीठासीन अधिकारी पीसी मोहन होरें प्रश्नकाल शुरू कराने दा जतन कीता पर कांग्रेस, तृणमूल कांग्रेस ते डीएमके सने विपक्षी सदस्य सदन दे बीच बशकार पुज्जिए नारेबाजी करने लगे। पीठासीन अधिकारी होरें उन्दे थवा सदन दा कम्म काज चलन देने ते प्रश्नकाल शुरू करने दी अपील कीती। हंगामे दे चलदे पशुपालन ते डेयरी राज्य मंत्री एस. पी. सिंह बघेल होरें पशुपालन अवसंरचना विकास निधि कन्नै सरबंधित सोआले दा परता देने दा जतन कीता,

पर शोर-शराबे करी ओहू बी अपना परता पूरा नेई करी सकै। हंगामा जारी रौहने पर सदन दी कारवाई दपैहरी 12 बजे तकर आस्तै स्थगित करी दिती गई।

<><><><><><>

RS-Budget Discussion

राज्यसभा च केंद्रीय बजट 2026-27 पर चर्चा परतिए शुरु होई गई ऐ। चर्चा च हिस्सा लैन्दे होई शिवसेना सदस्य मिलिंद देवरा होरें आक्खेआ जे बेहद राजनीतिक ते आर्थिक उथल-पुथल भरे दौर च भारत आर्थिक विकास ते स्थिरता दे मामले च इक विशिष्ट मिसाल ऐ। डीएमके पार्टी दी कनिमोई नै बजट गी गरीब-विरोधी दस्दे होई आक्खेआ जे एह देशे दी आर्थिक असलियतें थवा दूर ऐ। भाजपा दे सुरेंद्र सिंह नागर होरें आक्खेआ जे बजट च आर्थिक विकास बढ़ाने, जनता दी आसे तागें गी पूरी करने ते सामाजिक क्षेत्र दी सारी योजनाएं गी जनता तकर पजाने गी तरजीह दिती गई ऐ। इस दौरान लोकसभा च बी केंद्रीय बजट 2026-27 पर चर्चा शुरू होई। कांग्रेस सांसद शशि थरूर होरें चर्चा दी शुरुआत करदे होई आक्खेआ जे सरकारी खर्च च कटौती कीती गई ऐ ते कर संग्रह स्थिर रखेआ गया ऐ। उने आक्खेआ इस बजट च कॉरपोरेट्स दी तुलना च व्यक्तिगत करदाताएं मता बोझ पाया गया ऐ। भाजपा दी अपराजिता सारंगी नै आक्खेआ जे बजट सरकार दी प्रतिबद्धता, दृढ विश्वास ते निरंतरता गी दर्शान्दा ऐ। उने मुक्त व्यापार समझौतें पर दस्तखत करने आस्तै सरकार दी सराहना कीती। उने आक्खेआ जे भारत नै बदलदे वैश्विक परिदृश्य च समझदारी कन्नै अगगे बढ़ने दी अपनी क्षमताएं गी दर्शाया ऐ।

<><><><><><>

Rijju

संसदीय कार्य मंत्री किरिन रिज्जू होरे विपक्षी सांसदें पर लोकसभा दी कारवाई बाधित करने दा आरोप लाया। उने आक्खेआ जे विपक्ष दा आचरण सदन दी गरिमा प्रति उन्दे अनादर गी दर्शान्दा ऐ। संवादाताएं कन्नै गल्ल बात च श्री रिज्जू होरें आक्खेआ जे पिच्छले हफते कांग्रेस दी महिला सांसदें दा सत्ता पक्ख आहली पेठा जाना ते इत्थुआं तगर जे सदन च प्रधानमंत्री हुन्दी सीट कश पुज्जना शर्मनाक

कम्म ऐ। उने आक्खेआ जे भाजपा सांसदे, खास करी महिला सांसदे कांग्रेस सांसदे दे इस व्यवहार खिलाफ लोकसभा अध्यक्ष थवा शिकायत दर्ज कराई ऐ। श्री रिजिजू होरे आरोप लाया जे विपक्ष अपने सोशल मीडिया अकाउंट पर जश्न मना'रदा ऐ ते दावा करा र दा ऐजे महिला सांसदे प्रधानमंत्री होरे गी डराई दिता ऐ। उने आक्खेआ जे कांग्रेस सदस्ये दा एहू कम्म शर्मनाक ऐ ते लोकतंत्र दे खिलाफ ऐ।

<><><><><><>

Cyber Enabled Frauds

गृह मंत्री अमित शाह होरे अज्ज नमी दिल्ली च साइबर धोखाधड़ी कन्नै निबडने ते इसदे पारिस्थितिकी तंत्र गी तबाह करने पर आयोजित राष्ट्रीय सम्मेलन दा उद्घाटन कीता। इस मौके पर शाह होरे आक्खेआ जे साइबर सुरक्षा हुन देशे दी सुरक्षा कन्नै जुडी दी ऐ। उने आक्खेआ जे सरकार नै देशे च साइबर अपराध गी खत्म करने आस्तै केई पैहलकदमियां शुरू कीतियां न। शाह होरे आक्खेआ जे भारतीय साइबर अपराध समन्वय केंद्र - साइबर अपराध खिलाफ इक महत्वपूर्ण मंच बनी गया ऐ। उने देशवासिये बश्कार साइबर सुरक्षा दे बारे च मती जागरूकता फैलाने दी जरूरता पर जोर दिता। गृह मंत्री होरे केन्द्रीय अन्वेषण ब्यूरो-सी बी आई दी नमी साइबर अपराध शाखा दा बी उद्घाटन कीता ते गृह मंत्रालय दे राज्य साइबर अपराध समन्वय केंद्र डैशबोर्ड दी बी शुरुआत कीती। इस सम्मेलन दा मुख मकसद भारत च साइबर-आधारित धोखाधड़ी दे पैमाने, रुझाने ते बदलदे स्वरूप दे बारे च साझा जानकारी विकसित करना ऐ। दो दिन दा एहू सम्मेलन केन्द्रीय अन्वेषण ब्यूरो नै गृह मंत्रालय दे भारतीय साइबर अपराध समन्वय केंद्र दे सहयोग कन्नै आयोजित कीता ऐ।

<><><><><><>

Cargo Movement

केन्द्रीय पत्तन पोत, यातायात ते जलमार्ग मंत्री सरबानंद सोनोवाल होरे आक्खेआ जे एनडीए सरकार दी परिवर्तनकारी नीतिये करी देश नै बरे 2024-25 च राष्ट्रीय जलमार्गे पर रिकॉर्ड 14 करोड़ 60 टन माल हुलाई हासिल कीती ऐ। एहू बरे 2013-14 च इक करोड़ 81 लख टन ही। राज्यसभा च

प्रश्नकाल दौरान श्री सोनोवाल होरें आक्खेआ जे पिच्छले 10 बरें च अंतर्देशीय जलमार्गें पर 1700 करोड़ रुपे सोयां मते दा निवेश होआ ऐ, जेडा यूपीए सरकार दौरान छडा 183 करोड़ रुपे हा। उने दस्सेआ जे मौजूदा समें च 111 जलमार्ग चला र दे न, जेडे देशै च लॉजिस्टिक लागत गी गघट्ट करने च सहायक ऐ।

<><><><><><>

Paswan G Ram G

ग्रामीण विकास राज्य मंत्री कमलेश पासवान होरें आक्खेआ जे विकसित भारत – रोजगार ते आजीविका मिशन (ग्रामीण) अधिनियम छडा इक रोजगार कार्यक्रम नेई ऐ सगुआं ग्रामीण विकास गी गति देने आस्तै तैयार कीता गया इक व्यापक ढांचा ऐ। पासवान होरें अज्ज लोकसभा च इक सोआले दे लिखित परते च एह गल्ल आक्खी।

<><><><><><>

PM Kisan Scheme

प्रधानमंत्री-किसान योजना दी शुरुआत सोयां लेईऐ हुनै तगर सरकार नै 21 किस्ते च चार लख करोड़ रुपे सोयां मते दी राशि बंडी ऐ। राईबाई ते करसान कल्याण राज्य मंत्री रामनाथ ठाकुर होरें अज्ज लोकसभा च इक सोआले दे परते च एह जानकारी दिती। उने दस्सेआ जे प्रधानमंत्री-करसान योजना इक केंद्रीय क्षेत्र दी योजना ऐ। प्रधानमंत्री नरेन्द्र मोदी होरें फरवरी 2019 च करसानें दी आर्थिक जरूरतें गी पूरा करने आस्तै इसदी शुरुआत कीती ही। ठाकुर होरें दस्सेआ जे इस योजना तैहत हर बरे छह हजार रुपे दी माली सहायता 3 किस्ते च दिती जन्दी ऐ। उने आक्खेआ जे करसान-केंद्रित डिजिटल अवसंरचना नै एह यकीनी कीता ऐ जे इस योजना दा लाह मुख भरै दे सारे करसानें तकर बिजन कुसै बचोलिए दे पुज्जे।

<><><><><><>

Jaiswal-BRICS Sherpa

ब्रिक्स शिखर सम्मेलन दियें तयारियें च लगगे दे अधिकारियें दी पैहली बैठक कल नमीं दिल्ली च लगी। ब्राजील- रूस- भारत- चीन दे दक्खन अफ्रीका ब्रिक्स संगठन दे मुंडले मिम्बर ना। भारत चौथी बारी एहदी अध्यक्षता करने जा'रदा ऐ। आर्थिक सरबंध सचिव ते भारत दे ब्रिक्स शेरपा सुधाकर डलेला होरें प्रधानमंत्री नरेन्द्र मोदी हुं'दे जनहितैषी ते मनुक्खी सोच पर आधारित भारत दी ब्रिक्स अध्यक्षता दियें प्राथमिताएं दा जिक्र कीता ते संगठन दे उस लक्ष गी टकोहदे तौरा पर उजागर कीता- जेहदे च नवाचार- सहयोग ते निरंतरता बनाई रक्खना बी शामिल ऐ। एहदे शा पैहले भारत 2012-2016 ते 2021 च बी ब्रिक्स दी अध्यक्षता करी चुके दा ऐ।



Army Commander Basantgarh

उत्तरी कमान प्रमुख लैफ्टिनेंट जनरल प्रतीक शर्मा होरें आप्रेशन "कीया"दे सफलतापूर्वक सम्पन्न होने मगरा बसंतगढ़ दा दौरा लाया। इस अभियान दौरान 2 आतंकवादी मारे गे हे। उ'नें सभनें सरबंधी धड़े बश्कार नेडमें तालमेल दी सराहना कीती। सैनिकें कन्नै गल्लबात दौरान सेना प्रमुख हो'रें उच्च स्तह आहला पेशेवर रौंऽ अपनाते- निष्ठा ते हर बेल्ले कारवाई लेई तयार रौहने आस्तै उन्दी सिफ्त कीती। उ'नें जम्मू-कश्मीर गी आतंकवाद मुक्त बनाने ते शांति ते सुरक्षा दी लगातार ब्हाली लेई उं'दे धेइयै दी बी सराहना कीती।



BJP-Press Conference

भारती जनता पार्टी नै अज्ज बरोधी धड़ें पर जानी बुज्झियै मुल्लवै च अस्थिरता आहला म्हौल बनाने दा दोष लाया ऐ। नमीं दिल्ली च इक प्रेस कांफ्रेंस गी संबोधित करदे होई बीजेपी दे राश्ट्री प्रवक्ता संबित पात्रा होरें आखेआ कि एनडीए सरकार दे त्रीऽ बारी सत्ता च औने दे बाद कांग्रेस ते ओहदे सहयोगी

उत्परोतली सुप्रीम कोर्ट, चुनां आयोग, लोकसभा अध्यक्ष ते प्रधानमंत्री हुंदे सने देश दिएं संवैधानिक संस्थाएं पर हमले करा करदे ना। पात्रा होरें कांग्रेस ते पच्छम बंगाल दिएं मुखमंत्री ममता बनर्जी हुंदे पर मतदाता सूचिं दे नमें सिरेआ व्यापक नजरसानिं आहले अभियान एसआईआर खलाफ म्हौल बनाने दा आरोप लाया। एसआईआर गी लेइयै सुप्रीम कोर्ट दे फैसले दा जिक्र करदे होई पात्रा होरें आखेआ कि एह पच्छम बंगाल च ममता बेनर्जी हुंदे नेतृत्व आहली सरकार लेई इक बड्डा झटका ऐ।

<><><><><><>

NITI-Aayog

नीति आयोग नै अज्ज नमीं दिल्ली च विकसित भारत ते नेट जीरो दे सरबंघे च 4 अध्ययन रिपोर्टां जारी कीतियां जिंदे च बिजली, ट्रांसपोर्ट, उद्योग ते महत्वपूर्ण खनिजें दी मंग ते सप्लाई दे आंकलन पर केंद्रित क्षेत्रीय ब्यौरा ते जायजा शामिल ऐ। इस मौके पर नीति आयोग दे मुख कार्जकारी अधिकारी बी.वी.आर सुब्रह्मण्यम होरें भारत दे नेट जीरो लक्ष्यें गी हासल करने लेई इक लम्मी अवधि ते तालमेलद आहली रणनीति दी जरूरतै पर जोर दिता। उनें आखेआ जे आर्थिक विकास ते पर्यावरण पर आधारित स्थिरता मझाटै संतुलन बनाई रखने लेई स्पष्ट नीति निर्माण ते इलाकाई विशिष्टता योजना बडी जरूरी ऐ। सुब्रह्मण्यम होरें आखेआ कि 2070 च बी उद्योगें दी करीब चौथा हिस्सा खपत जीवाश्म ईंधन राएं गै पूरी होग ते इसी कार्बन कैप्चर ते होरनें तकनीकिं राएं गै काबू कीता जाहगा। इस मौके पर बिजली मंत्रालय दे सचिव पंकज अग्रवाल होरें आखेआ कि भारत दे उर्जा परिवर्तन च बिजली क्षेत्र दी प्रमुख भूमिका रौहगा।

<><><><><><>

Bangladesh Desh Polls

बंगलादेश च 13मीं जातीय संसद चुनाव ते जनमत-संग्रह आस्तै प्रचार अज्ज बडलै सम्पन्न होई गेआ। मतदान बीरवारें होग। संसदीय चुनाव ते जनादेश आस्तै मतदान जुलाई दे नेशनल चार्टर दे तैहत होंडन। ढाका स्थित गैर-सरकारी संगठन एमिनेंस एसोसिएट्स फॉर सोशल डेवलपमेंट दे सर्वेक्षण च

बंगलादेश नेशनलिस्ट पार्टी दे नेतृत्व आहले गठबंधन दी निर्णायक बढत दा अनुमान जाहिर कीता गेआ ऐ। इस गठबंधन गी दो सौ 8 सीटां थहोने दा अनुमान ऐ। जमात-ए-इस्लामी गठबंधन गी 46 सीटां, जातीय पार्टी गी 3, होरने दलें गी 4 ते निर्दलियें गी 17 सीटां थहोने दा अनुमान ऐ। एह सर्वेक्षण 41 हजार 5 सौ लोकें दी प्रतिक्रियाएं पर आधारित ऐ। इसी मतदान सोयां पैहले हुनै तगर दा सबने थवा बड्डा सर्वेक्षण दस्सेआ गेआ ऐ। यूनुस प्रशासन आस्सेआ अवामी लीग पार्टी गी राजनीतिक गतिविधियें ते चुनाव हिस्सेदारी सोयां बक्ख करने दे मगरा जमात-ए-इस्लामी ते बंगलादेश नेशनलिस्ट पार्टी अवामी लीग दे मतदाताएं गी अपनी पेठा करने दे जतने च लग्गे दे ना। बंगलादेश दे चुनाव आयोग नै सखत सुरक्षा इन्तजाम कीते दे ना। 14 फरवरी तक सेना ते होरने बलें गी विशेष ड्यूटी पर लाया गया ऐ।



UN Bangladesh Attacks

संयुक्त राष्ट्र महासचिव अंतोनियो गुतरेस होरें बंगलादेश च संसदीय चुनावें कोला पैहल सेना ते पुलस आसेआ पत्रकारें पर कीते जा'रदे हमलें दिएं खबरें पर चिंता प्रगट कीती ऐ। गुतरेस हुंदे प्रवक्ता स्टीफन डुजारिक होरें इस बारै जारी इक बयान च आखेआ कि एह गल्ल बडी लाजमी ते महत्वपूर्ण ऐ कि बंगलादेश च चुनावें उत्थूं दे संविधान ते अंतरराष्ट्री जिम्मेवारिणें ते जवाबदेहिणें मुजब समावेशी, साफ-सुथरे, पारदर्शी ते रमानदारी आहले म्हौल च करोआए जान। बंगलादेश च पत्रकारें पर होआ'रदे हमलें दी पछोकडै च पुट्टी जा'रदिणें चिंताएं पर संयुक्त राष्ट्र प्रवक्ता होरें आखेआ जे एह खबरां इक गैहरी चिंता आहली गल्ल ऐ।



BCCI-Player

भारतीय क्रिकेट कंट्रोल बोर्ड-बीसीसीआई नै सीनियर मर्दे ते महिला टीमें दे खडारिएं दे सालाना अनुबंधें दी घोषणा कीती ऐ। सीनियर मर्दे दी टीम च शुभमन गिल, जसप्रीत बुमराह ते रविंद्र जडेजा गी ग्रेड ए च रखेआ गया ऐ। जिसलै कि, रोहित शर्मा ते विराट कोहली जनेह टेस्ट ते टी-ट्वेंटी क्रिकेट सोयां संन्यास लेई चुके दे सीनियर खडारिएं गी ग्रेड बी च रखेआ गया ऐ। महिलाएं दी सिनियर क्रिकेट टीम च हरमनप्रीत कौर, समृति मदाना, जैमिमा रोड्रिक्स, ते दिप्ती शर्मा गी ग्रेड ए च रखेआ गया ऐ।



ICC Pakistan Bangladesh

अंतराष्ट्रीय क्रिकेट परिषद ICC नै मर्दे दे टी-20 विश्व कप 2026 दे सब्भनें तैयशुदा मैचें च पाकिस्तान दे शामिल होने दी तस्दीक कीती ऐ। एहदे च 15 फरवरी गी कोलम्बो च भारत ते पाकिस्तान बश्कार होने आहला मैच बी शामिल ऐ। ICC नै दस्सेया ऐ जे पाकिस्तान क्रिकेट बोर्ड नै गल्लबात व्यापक सहयोग दा हिस्सा ही- जेहदे च दौनें धडे खेडु दे हितें दी रक्षा लेई निपक्खता ते सहयोग भावना कन्नै इकजुट- प्रतिबद्ध ते लक्ष केन्द्रित होने पर सैहमती प्रगट कीती ऐ। एहदे शा पैहले ICC- पाकिस्तान क्रिकेट बोर्ड ते बांगलादेश क्रिकेट बोर्ड बश्कार इक बैठक होई ही। एहदे बाद ICC नै इस गल्लै दी तस्दीक कीती ही जे बांगलादेश गी टूर्नामेंट थमां गैर हाजर रौहने कारण कुसै बी चाल्ली दी सजा दा सामना नेई करना पौग।



Biofach-2026

जर्मनी दे नूरेमबर्ग च आयोजित जैविक उत्पादें दे विश्व दे अगुवाहू व्यापार मेले बायोफैच 2026 च भारत गी प्रतिष्ठित 'ब'रे दा सर्वश्रेष्ठ देश' दा सम्मान प्रदान कीता गया ऐ। एह सम्मान 14 बरें दे

मगरा वैश्विक जैविक कृषि दे केंद्र च भारत दी वापसी दा प्रतीक ऐ। बायोफैच 2026, 13 फरवरी तकर चलोग।

<><><><><><>

Spl. Trains

उत्तर रेलवे दे जम्मू डिवीजन नै जम्मू-कश्मीर च यात्रियें गी बेहतर सुविधा उपलब्ध करोआने लेई विशेष रेल नम्बर 04688-04687 दी सेवाएं गी बढ़ाई दिता ऐ। साहडे जिला संवाददाता नै जानकारी दिती ऐ जे 11 फरवरी थमां एह रेल गड्डी बनिहाल दे बजाए श्री माता वैष्णो देवी कटरा रेलवे स्टेशन तगर चलोग। इस दौरान रेल गड्डी नम्बर 04688 बडगाम ते बनिहाल बश्कार अपने मौजूदा कार्यक्रम मताबक चलोग ते फही बनिहाल थमां बडुलै 10 बज्जियै 10 मिन्टें पर रवाना होग ते रस्ते च बक्ख-बक्ख स्टेशनें पर रुकियै दपैहरी'लै इक बजे कटरा पुज्जोग। वापसी आहली रेलगड्डी 04687 दपैहरी'लै इक बज्जियै 45एं मिन्टें पर कटरा थमां रवाना होग ते संजा साड्डे 5 बजे बनिहाल पुज्जोग ते फही तैय समें मताबक बडगाम लेई रवाना होग।

<><><><><><>